



JUDICIAL SYSTEM MONITORING PROGRAMME

PROGRAM PEMENTAUAN SISTEM YUDISIAL



Komunikadu Imprensa

Edisaun : Agostu 2011

Publikasaun : 23 Agostu 2011

Rede Referál Distritu Baucau halo'ó Sosializasaun konabá idak-idak nia Funsau/Kna'ar

Durante loron rua nia laran hahu husi loron 18-19 Agostu Ekipa Rede Referál Distritu Baucau halo sosializasaun ba Suco Afaça, Triloka no Buibau.

Rede referál ne'e kompostu husi Fundasaun Alola nu'udar Koordenadora, PDHJ Distritu Baucau, VPU Distritu Baucau, JSMP/VSS, Pontu Fokal ba Jéneru Distritu Baucau, Oficial Proteasaun ba Labarik Distritu Baucau, IOM, inklui mós Saude Mental sira.

Sosializasaun ne'e ho objetivu hodi dizamina informasaun konabá kna'ar Rede Referál no membrus rede ida-idak nia funsau, wainhira sira hasoru kazu violénsia bázeia ba jéneru sira iha ona koñesimentu atu refere kazu.

Tuir Ofilia Lemós, Representante Feto rua Suco Buibau hateten katak *“ami apresia tebes ho iniciativa husi Rede Referál Baucau, ho atividade hanesan ne'e ami bele iha koñesimentu ne'ebé kle'an liu tan hodi nune'e wainhira akontese kazu Violénsia Bázeia ba Jéneru iha ami nia Suco laran bele refere lalais hodi bele responde ba nesesidade vítima sira nian atu asesu ba sistema justisa formal.*

Aliende ne'e Representante Juventude Suco Triloka hatutan katak *“Sosializasaun hanesan ne'e importante tebes mai ami nu'udar Joventude, tanbá ami bele hatene konabá mekanismu refere kazu ba Rede Referál no hein katak atividade hanesan ne'e laos deit iha realize Suco laran maibe mós bele to'o iha aldeia ho nune'e informasaun hirak husi ekipa ne'e bele pasa ba comunidade em jerál.*

Tuir JSMP nian hanoin sosializasaun husi Rede Servisu Referál Distritu Baucau ne'e ho objetivu atu transfere informasaun ba comunidade konabá funsau Rede Referál ne'e rasik no kada membrus ida-idak nia kna'ar hodi bele responde ba nesesidade vítima violénsia bázeia ba jéneru. Aliende ne'e liu husi atividade hanesan ne'e nu'udar dalan ida atu bele fo konesimentu diak liu tan ba comunidade konabá JSMP nia servisu liu-liu Unidade Suporta ba Vítima ka Victim Support Service.

Tuir observasaun JSMP iha atividade sosializasaun ne'e partisipantes sira mós hatudu katak sira ativu tebes iha diskusaun tanbá tuir sira, informasaun hirak ne'e ajuda tebes sira hodi bele atende problema ruma bainhira akontese iha sira nia Suco.

JSMP hein katak ho atividade ne'e bele apoiu comunidade no sira iha área refere hodi hametin diak liu koñesimentu ba membru Lider Komunitária sira hodi responsabilidade no tulun vítima sira hodi asesu ba sistema justisa formal.

Atu hetan informasaun klean favor kontaktu:

Luis de Oliveira Sampaio
Diretór Ezekutivu JSMP
Diresaun e-mail : luis@jsmp.minihub.org
Telefone : (+670) 3323882/729579